

TORITENY - ALAHADY faha-29 TSOTRA - TAONA D



Andriamanitra indray va no tsy hanome rariny ny olom-pinidiny izay mitaraina aminy andro aman'alina, ary tsy halaky hamonjy azy ?

Ry Kristianina havana tamin'ny Alahady lasa teo isika nibanjina manokana ny finoana izay nahitantsika taratra ny nanjo an'i Naàmana ilay jeneraly sirianina raha niditra tao amin'ny ranon'ny joridany izy ka nadio ary afaka ny aretinkodiny, niverina tamin'ny toe batany teo aloha izy.

Nahitantsika koa ireo marary hoditra folo lahy izay nositrarin'i Jesoa sy nodioviny fa anankiray ihany

Vakiteny I : Eks. 17: 8-13

Salamo : Sal. 120

Vakiteny II : 2 Tim. 3, 14 — 4, 2

Evanjely : Lk. 18, 1-8

no nahatsiaro nankasitra an'Andriamanitra. Ho famintinana izany rehetra izany dia nilaza isika fa ny finoana velona dia mitaky faharetana, raha mitoetra amin'ny finoana isika ka manompo anatin'ny faharetana isika manatanteraka ny sitrak'Andriamanitra dia ho tsara ny fiainantsika. Zary EOY Misionera. Ny famenoana sajoa saota, siny enina no

fanehoantsika fivelomantsika ny finoana.

Amin'izao volana oktobra volana voatokana ho an'ny misiona dia hanirahana antsika hibanjina kokoa ny maha misionera antsika Kristianina zanak'Andriamanitra tamin'ny alalan'ny batemy noraisintsika.

« Vita batemy aho ka hirahina », misionera ka mandinika manokana ny finoana mahatonga antsika ho tena vavolombelona. Anatin'ny volana oktobra koa no hanaovantsika ny raozery hibanjinantsika sy handinihintsika miaraka amin'i Masina Maria ny misterin'ny famonjena antsika. Finoana velona izany fa tsy finoana resaka sentosento fa hoentina miatrika ny fiainana, mampitraotra ny finoana sy ny fiainana andvanandro mba ho EOY hanorina Eglizy Tranoben'Andriamanitra ka ho tonga misionera eo anivon'ny mpiara-belona amintsika sady mampiditra antsika amin'ny fankalazana ny kongresy eokaristika. Izany no nofidianantsika ity taona ity ho taona misionera ka i Masina Maria no modelintsika amin'izany. Eo koa ireo mpiaro manokana ny AFAFI dia i Md François Xavier izay nitory ny vaovao mahafaly tamin'ny toerana sarotra indrindra tamin'izany fotoana izany.

Mb Terezin'i Jesoa zazakely mpiaro ny misiona hitalahoantsika handrotsaka ny « orandraozy » ho antsika amin'izao taona masina ny misiona izao.

Amin'izao Alahady faha 29 mandavantaona izao, asain'ireo vakiteny telo isika handinika bebe kokoa ny vavaka sy ny anjara toeran'ny vavaka, ny antony tsy maintsy hivavahantsika sy ny vokatry ny vavaka eo amin'ny fiainantsika. Io dia kriterana fototra mikasika ny finoana. Anisan'ny sajoa voalohany tsy maintsy fenoina ny « mivavaka » amin'izao dia sady ady ataontsika hahatonga antsika ho misionera. Averimberintsika matetika ny fanontaniana hoe « ahoana ny hahafantarana fa manana finoana velona ? »,

Voalaza fa velona ny finoantsika raha manompo isika ary modely ho antsika i Masina Maria, finoana velona ny finoana raha manana faharetana isika amin'ny fivelomantsika ny finoana, mbola i Masina Maria ihany no modelintsika satria teo ampototry ny hazo fijaliana izy niatrika an'i Jesoa zanany nanolotra ny ainy, tsy maintsy manana faharetana isika.

Azo lazaina fa ny vavaka no kriterana fahatelo raha zohintsika ny fandalinampinoana mianga amin'ny vakiteny natolotry ny Eglizy tatoato. Ny vavaka kosa no voalohany amin'ny sajoa saota hoy isika. Ny vavaka tokoa no hanambarana fa velona ny finoantsika, raha tsy mivavaka isika dia finoana tsy velona ny finoantsika. Io no asain'ny Eglizy hodinihintsika amin'ny alalan'ireo vakiteny arosomy amin'izao Alahady izao.

Hitantsika amin'ny vakiteny voalohany ny tantaran'i Moizy sy ny vahoaka : rehefa tsy nanandratra ny tanany i Moizy izay midika fa tsy mivavaka izy dia resy « *Raha nasandratr'i Môizy ny tanany dia i Israely no nahery; fa raha nitambotsotra kosa ny tanany, i Amaleka no nahomby.* »

Raha tsy mivavaka isika dia tsy mamokatra ny fiainantsika, fampianarana velona ho antsika ny vakiteny voalohany. Izany no mahatonga antsika handinika ny hoe inona ny anjara toeran'ny vavaka eo amin'ny fiainantsika ?

Matetika isika mitodika amin'Andriamanitra rehefa mitalaho, vavaka izany nefa tsarovy fa na dia marina fa ny fitalahoana ny fahasoavan'Andriamanitra ny vavaka ary avy aminy ny hananantsika ny hery rehetra entintsika mamakivaky ny fiainana, na dia eo koa ireo fijaliana dia fantaro ry Kristianina havana fa tian'Andriamanitra hanana fo amam-panahy misy azy isika izany hoe isika rehefa mivavaka dia mieritreritra fa hahazo ny fahasoavana. Marina izany fa ny tena tadiavin'Andriamanitra rehefa mivavaka isika dia izy no mandray an-tànana ny fiainantsika ka zary fitaovana ho entiny hanitarany ny fanjakany isika. Tian'Andriamanitra ny fo amam-panahintsika ho azy tanteraka amin'izay izy mitondra ny famindrampony amin'ny alalantsika eo amin'ny mpiara-belona, izany no vavaka finoana velona. Ampiasain'Andriamanitra isika noho ny vavaka ataontsika, anambarany ny fitiavany, miasa ao amintsika Andriamanitra ka afaka manova ny fiainantsika izy ka isika mitondra ny fitiavan'Andriamanitra eo amin'ny mpiara-belona. Andriamanitra tena mitady antsika ary mety tsy ampoizintsika izany. Amin'ny alalan'ny vavaka dia Andriamanitra miombona amintsika ary raha ao amintsika izy dia miova ny fiainantsika ka ho entanin'ny fanahin'Andriamanitra isika ka zary fitaovana ampiasainy eo amin'ny manodidina antsika.

Izany no ambaran'i Md Paoly amin'ny vakiteny faharoa, ho lavorary ny olon'Andriamanitra ary vonona amin'ny asa soa rehetra. Raha mandinika tokoa isika ny vavaka dia manampy antsika hanana faharetana ka mivelona ny maha zanak'Andriamanitra isika. Voalazantsika matetika fa raha manao ny asan'Andriamanitra isika dia Andriamanitra manao ny asantsika ary izany no vokatry ny finoana velona sy maha misionera antsika satria vavolombelon'Andriamanitra isika zary fanilo sy fahazavana eo amin'ny manodidina antsika. Aoka isika hanaiky handray an'Andriamanitra eo amin'ny fiainantsika.

Inona ary ny atao hahazantsika handray an'Andriamanitra ?

Dia ny voalazan'i Jesoa amin'ny evanjely dia ny faharetana, raha miresaka fivavahana isika dia faharetana no toetra takin'ny vavaka mba ho lasa tabernakla tahaka an'i Masina Maria izay banjinintsika manokana amin'izao volan'ny raozery izao. Raha tsy manana faharetana isika dia tsy handaitra amin'ny fiainantsika ny vavaka.

Efa nambarantsika tamin'ny vakiteny voalohany, raha tsy nivavaka i Moizy dia resy ny vahoaka, toy izany koa raha tsy mivavaka isika dia maro ny fakam-panahy sy zavatra mifamahofaho amin'ny fiainantsika, lavo amin'ny fakam-panahy isika ka lasa tsy zarizary ny fiainantsika izany hoe tsy ao anatin'ny fivavahana ka noho izany ilaina sy mila faharetana ny vavaka.

Raha mivavaka isika inona ny vokatra andrasantsika ? Voalaza ao amin'ny evanjely, « lazaiko aminareo fa omeny rariny haingana izy ireo kanefa rehefa tonga ny zanak'olona moa hahita finoana eto anivontany izy ? Aoka ary hahatoky isika fa raha manana faharetana amin'ny vavaka isika dia hahazo vokatsoa satria tsy inona fa Andriamanitra eo amin'ny fiainantsika. Hiezaka àry isika hameno ny sajoa voalohany : « mivavaka »

Hitantsika amin'ny vakiteny faharoa ampianarin'i Md Paoly an'i Timote ka ampianarina amintsika ihany koa.

« Eo anatrehan'Andriamanitra sy i Kristy Jesoa, izay hitsara ny velona sy ny maty, ary noho ny andro hahatongavany sy hanjakany: Mitoria ny teny, ary mahareta amin'izany na amin'ny fotoana na tsy amin'ny fotoana: manitsia, mananara, mamporisiha, amim-pandeferana sy amim-pahaizana mandrakariva ». Izany no anjaran'olon'Andriamanitra, ny olona misionera, io no anjaram-piainantsika hahitantsika fahasoavana amin'ny alalan'ny vavaka ary am-paharetana no hanaovantsika azy na dia misy ny manenjika antsika aoka antsika hahatoky fa Andriamanitra ao amintsika.

Tadidio ireny hafatra nampianarin'Andriamanitra antsika, aoka isika ho vonona hampirisika, hananatra, hanitsy am-pandeferana ireo manodidina antsika.

Ry Kristianina hava malala aoka isika hahatoky mandrakariva ny famindrampon'Andriamanitra fa izay miombona amin'ny famindrampon'Andriamanitra dia miova ny fiainany ka hanana ny fiainana misy an'Andriamanitra isika, misy fifankatiavana sy fahamarinana mampanjaka ny rariny sy ny hitsiny sy hikatsaka ny soa iombonana. Izany no antenaintsika amin'ny famakivakiansika ny oktobra volana manokana ho an'ny misiona sy mampiditra antsika amin'ny taonany misiona hahatonga antsika hanana finoana velona. Velona ny finoantsika raha manompo isika, raha manana faharetana isika, raha ao anatin'ny fivavahana tokoa ny fiainantsika ka hahatonga antsika ho tena Eglizy Olona Velona mampanjaka ny rariny sy ny hitsiny ary dia manorina Eglizy Tranoben'Andriamanitra isika ka ho tena génération mpanorina tokoa izay mamafy fiadanana sy fanantenana amin'ireo mpiara-belona amintsika, mamafy fiadanana ka hahatonga ny fiainantsika ho fiainana misy an'Andriamanitra, fianakaviana Eglizy kelin'Andriamanitra ka zary vavolombelona misionera tokoa eo amin'ny manodidina antsika. Amen